

思

軒

文

集

思軒文集卷之十二

說

馬生良弼字說

太子少保戶部尚書滄州馬公之冢子名忠今南京刑部尚書周公之館甥也馬公致仕家居篤意庭訓趨諸子以學忠學成且加冠矣而未育字周公近入朝過之取書說命篇中語字之曰良弼比歸屬予說以勉之予聞之先儒之訓有曰中心為忠又曰發已自盡為忠謂盡其心而不欺也內盡其心而不欺於人道無不當然而於臣道尤不可以不然故曰欲為臣盡臣道蓋臣道

之所當盡者忠焉而已也觀之往史有以忠義目之者
雖其所遇不同所就不同要之皆能盡臣道皆輔弼
之良者也書之史以勸忠也勸之而忠此後世之所謂
賢也三五之世忠不待勸故傳說賢高宗求之曰良臣
惟聖曰惟后非賢不乂惟說式克欽承以匡乃辟康兆
民必盡忠如是而後為無愧於良弼也雖然古之聖君
之求弼於臣與其臣之承弼於君者不特高宗之於說
也舜命皋陶亦曰弼五教期于予治皋陶陳謨曰允迪
厥德謨明弼諧禹告舜以惟幾惟康其弼直舜感其言
而有臣鄰之嘆又曰予違汝弼弼成五服禹固嘗以慢

遊是戒此虞夏君臣之所以交修者曷嘗有廢於輔弼之義也胤侯徂征以弼予欽承戒多士武王伐殷又戒衆以爾尚弼予一人永清四海周公東征謂天明畏弼我不丕基治洛初政則又謂弼我我其敢求位斯又可見三代之王匪徒臣輔之雖天亦輔相之厥後成王訓迪百官亦望其弼予一人承弼厥辟咸懷忠良穆王又舉以命伯冏復申之以承弼乃后于彛憲然則有周之享國長久者雖輔相於天抑亦不能無賴於其臣也公之所以教於家者計亦不外於經訓也公起家科第致位卿相策勲立業期於盡瘁可謂能忠敬歷四紀左右

列聖正色立朝屹然老成人可謂良弼以至於倦劇而
休從容進退求之古人殆不多讓夫既以是用之
朝施之當時而復歛而刑之家授之於其子則忠之所
嘗受教者又不徒聞之過庭而已也公之命名周公之
制字夫豈無所謂哉忠去是益加勉焉奉之經參之史
早夜孜孜克邁乃訓以古人自期以
堯舜君民自任以址美於公所謂世篤忠貞服勞王家
厥有成績紀於太常予已羨於公抑又不能無望於良
弼也是為說

黃氏二子字說

南京戶部尚書三山黃公有子二人既名而字之矣間屬予為說且曰吾之所以名子者意各有在也吾為浙江僉事時年四十有五而長子初生蓋求之久而後得之如久旱而得甘澍因名曰澍明年陞廣東叅政舟次螺川驛而次子生舊僚吳御史時極吉人也為予卜遇渙之初六爻見因即其卦而以渙名之說禮者嘗云古人名子或有所因此正我類也所謂既冠而賓字之其取義固不在我故浙臬同官嘗字澍曰文澤時極又字渙曰文濟然皆不俟其冠似亦太早計也然而諸君子之欲吾子之成之速以早棄其幼志驟躋於成德其意

亦良厚矣吾從之而猶懼其不足以與此顏先生繹其
義而為之說以卒教之使知顧名而思義焉斯幸矣予
既不可辭乃進二子而告之曰按字書澍時雨也萬物
之生必待時雨之澤君子之得時行道使膏澤下于民
亦猶是也然必朋友講習以資麗澤之益從師授受有
如時雨之化而後可以推之以澤潤生民書曰若歲大
旱用汝作霖雨吾於澍乎有望也渙之為卦合巽木坎
水而成而乘木濟川之象利涉大川所以濟渙也初六
雖未有濟渙之才而君子當拯之於始故未濟而盡恭
順之道既濟而存中正之心然後可以行道濟時以康

濟小民書又曰若濟巨川用汝作舟楫渙其勉之雖然
是皆無待於外求也子之嚴君由名進士為才御史為
賢方岳入貳都臺致位六卿其惠利足以澤人其功業
足以濟時今澍既以蔭入太學遊場屋有聲而渙學亦
有端緒所謂歸而求之有餘師者在二子宜無讓也予
何說哉

王承之字序

予友工部郎中朱君廷用嘗字其高弟王紹宗曰承之
蓋是時承之之父彥實已違世工部欲其克承遺訓而
無愧於為子也故以是易名承之間謁予請一言為規

予讓未知彥實之教且知承之又莫能如工部之知之深也其簡留予所久之自是寢得承之之為人通敏有志分治春秋三傳學而又以其餘力學醫工書皆有成往歲秋詔修

英廟實錄禮部簡求士類之善書者繇史館承之在列去此將需有祿仕通顯矣而承之尤孳孳於學以究所未至古有之不知其父觀其子承之之善學如此其有得於彥實之教可知矣雖然古之稱賢子者不貴乎學術之精官爵之顯而惟在乎紹述前人以毋貽其羞也盖前人之所遺者德也我則以敬承之而已自一心之

操存以至一身之動履皆罔敢或肆使行成于己者無
或虧善取諸人者無不足而且積學以文之立名以彰
之如是則彥實之德自我而有永矣是非承之之所宜
加勉者哉工部先此已去為廬州守而予亦將去官南
都與承之別矣承之念師承之睽遠感歲月之流邁必
請予言以終其說故勉為著此

錢氏四子字說

錫山錢君孟溥號南丘者魁壘傑特士也錢氏之先世
有令聞至孟溥益加封殖而思以貽其後人俾無忝厥
紹凡可以訓之飭學戒之勵行勉之脩德者無所不至

至於一名字之立亦致謹而無忽此豈無所謂也哉蓋
將使之仰承父師之訓而猛然省惕然懼於統承先業
光寵門閥亦將無所不至矣君有子四人名之曰楷榮
槩格字之曰世端世恩世節世則予友吳門賀美之既
為說以授之矣間又請予一言加勉按字書楷訓式訓
法非所以訓端也然非端直而不頗者不可以為法式
榮訓華有敷暢之義與恩義若不相通然非受恩于上
舉不足以為華暢槩之義不獨訓節凡用以平量器曰
槩有感觸於中亦曰槩如所謂大槩槩然於心皆是也
殊不若節槩之義為要格至也書曰遠人格正也傳曰

有恥且格又感通變革皆用也而訓法則者為體如曰
有典有則曰有物有則格之時義大矣哉爾四子者盍
亦觀諸字其所以不拘拘於韻書字義者蓋將以責成
於爾以世其家以亢其宗非苟焉而已也爾家自武肅
以來享有爵土歷五季更四世餘八十年雖窮極貴富
而奉琛稱貢于中國者史不絕書蓋世守臣節非倔強
一方者比此朝廷所以寵賚褒錫以推恩于其宗者亦
至渥而非他方可跂及也雖然彼一時也以大義律之
有未得為端也有非可以為則也必若爾始遷之祖曰
進之肇開厥家其嗣寬甫之克篤行誼彥春為山長以

文學顯名公達在鄉評以長厚著稱惟義爾祖也既積德累善而爾父南丘尤倜儻好義謂非爾所宜則而端厥志操者乎爾尚勉焉毋怠毋忽由是而出為世用處而克家顯榮光大承恩寵于當時盤根錯節持風槩於流俗雖不必遠宗吳越而於所謂世其家與亢其宗者自非閭左之人之可儼矣爾尚勉焉

薄二子字說

江陰之鄧易蔭良器氏有二子其長曰章憲質粹而性敏年弱冠讀書以舉進士為業曰章程其少者亦聰慧秀穎良器撫之曰吾子固已有受教之地矣吾聞之盧

氏教諭王公學博行端曷禮聘以為之師翰林學士王公名能文詞善忠告曷蘄為製字以為之勉二公者吾薛氏姻也宜無辭庚寅歲正月丁未教諭公往就師席章憲具冠服與其弟出見予時亦忝廁賓席遂偕為之言曰按周禮懸法示人曰憲後人因謂憲為法如傳所謂憲章文武是也說文程品也法令品式之謂如史所稱章程核名實是也夫以商高宗之賢猶資良弼以輔成其德故傳說告之曰監于先生成憲其永無愆以漢高祖之雄才大略猶藉一時共事之臣以經畫賛理故張蒼位列侯居相府定章程為天下楷式說商賢相也

蒼漢名臣也士力學思奮庸于時亦期以懋說之道勉
蒼之績可也雖然學者無所不用其極也懋說之道勉
蒼之績固未若志伊尹之所志也伊尹恥其君不為堯
舜一夫不獲則曰時予之辜未仕而求其志已仕而達
其道致吾君為堯舜之君使吾民為堯舜之民詎非吾
為士者所宜勉哉吾請字章憲曰堯卿章程曰舜卿盖
將望之為堯舜之臣也於戲道德法度皆成憲所在味
焉者無以為學之準的曆數權衡皆章程所在紊焉者
無以為政之根柢遜志于學以舉而施之有政釐百工
熙庶績堯舜之道亦不外是吾於二子有望也版築勅

起北平聲封詎容以是自畫哉

陸生昊宇說

金陵陸廷輝氏其先自吳門來徙者再世矣所居直白下橋闌闌中操奇贏以游者錯出左右廷輝雖混迹囂埃而其心固休休焉若脫去世累不屑為市之道者蓋其平生樂從章逢講談理道求所以處世應物之方庶幾其有所得故也廷輝生子一曰昊頗秀穎遣從里社師遊策勵之使無荒於嬉今年甫十八頭角嶄嶄如成人廷輝乃筮日禮賓加冠于其首賓字之曰汝大矣間謀於所親臧仁輩曰吾聞之釋字有文古之人所以勗

其子於禮之始者大率藉此今吾子將安得儒君子一言以勗之仁遂與偕來以字文為請禮有之冠而字之所以責成人也今世士大夫家率鮮克舉之以責成於子豈其禮不可行于今哉安於俗故也而廷輝乃能之又豈特不為市之道哉按說文昊元氣昊然廣大也人稟天地之氣以生故其一身為家國天下之本而天地萬物之理皆具焉可謂大矣人能于日用之間操存省察使一言一動不少桡於形氣之私是能充其大也充其大得之於性命之正為大德行之于夫婦父子兄弟之類為大倫用之于治國平天下而使人共由之為

大道凡此皆昊之所當勉也毋徒曰吾之身眇然于天地間曷敢妄自誇大如此是自小矣自小則流于污下而將為小人之歸矣豈廷輝之所望於昊者哉勉之汝大勤學好問以遠大自期則他日所以大其家聲未必不自此而基也仁尚為我語廷輝試高大其門閭以俟

蔣氏二子字序

蔣氏世為毘陵儒醫蓋自達善甫以來四傳而為通政使司左通政李文遂以其道用於朝五世而為常州府醫學正科惟訓又以其道行於郡由是籍咸之名相望一時而燕翼之詒亦裕於來裔矣蓋惟訓二子長曰徽

既授以醫業次曰徵則俾為儒生業進士舉二子者有
美質有嚴教其成也可計日待而猶未有為之字者惟
訓近以書來曰先生幸無靳一言以進之於道可也噫
予固非知道者然惟訓予所厚也庸可辭乎乃進二子
而告之曰夫徵者美也詩所謂徽音徽猷皆是也然其
所最要者則書所謂慎徽五典蓋五典美則著而為聲
譽發而為謀猷無不美矣徵乎請字子以慎之徵之義
有訓召者即史所書三徵七辟有訓驗者即傳所稱九
徵而不變然其義尤切者則又有訓成者焉說文謂行
於徵而聞達者非行成而名就者不可也徵乎請字子

以成之雖然士之所當慎者不獨五品雖一言一行皆不可以不慎況賢者民命所繫處方製劑苟不慎焉則必至於孟浪而戕人之生矣儒者之所當成不徒在己由己而推之物皆其所當成也故學優而仕將以治人使政不成則鹵莽滅裂而人有不得其所者矣二子其尚勉之哉為賢必至於岐咸和緩為儒必至於伊傳周召如是而謂之慎謂之成斯可也毋諉曰此神人也此聖賢之徒也則吾豈敢是不可以語上也非吾所以進二子於道也

孫氏二子字說

金陵孫宗漢氏其先青齊間人

國朝洪武初徙京師

自宗漢之父以及其子若孫四世矣而資業不墮慶澤不替其積累于先與續承于後者固不乏也使或繼是非賢雖遺之以千金之產數世之澤彼將一旦而傾覆之尚何近小之足言哉宗漢常為是懼既名其二子曰椿曰桂間謁予請字且求為說以勗之予惟植物之中至壽者莫如椿莊周氏有云大椿以八千歲為春八千歲為秋字椿曰大年期其永於年齡也至芳香者莫如桂古人有詩頌燕山竇氏者曰丹桂五枝芳字桂曰大芳期其芳聲之遠播也雖然年齡不可以易而得惟仁

而後可得椿其勉焉以仁存心自惻隱之發擴而充之
以至於親親而仁民仁民而愛物不殘忍以害吾仁無
私欲以梏吾仁則心存理得而自無天閼之患矣故傳
又曰仁者壽芳聲之所以能遠播者惟有德者為然桂
其勉焉以德自樹自日用常行之間凡道之所當行者
皆身體而力行之使有得於心如事親之孝從兄之敬
之類皆行而有得則德無不成而聲譽之美自然播聞
於人人故書又曰明德惟馨仁以守之使其心不役於
外物德以全之使其身不陷於非義由是而用於承家
業益隆用於嗣世澤益衍又不特永年齡流芳譽而已

也椿也桂也其可忽是而不加勉乎宗漢聞予言而喜
曰命之矣遂書以為之說

贊

宋駙馬鄭士懿遺像贊

定齋鄭公閩人宋端平二年進士尚主官駙馬
給詔久之謝事歸寧德以壽考終于今二百三
十有九年矣而華表猶存廟祀不絕遺文之藏
于家者垂之不刊觀此可以知其人之公十世
孫祥為太學生念公與主遺像故閣復命工摹
寫且求予作贊以表章之孝子慈孫之用心也
故不解為贊以貼之

名莫顯於登甲科身莫貴於尚公主晚節莫榮於衣繡
畫遊令譽莫加於文章名世噫斯數者人所難能而定

齋蓋燕而致之此所以寵被當時慶鍾後裔峙華表于
三峯而享廟食于千禩者也

宋自政和以後改公主為帝姬國號皆易以美
名此主號未詳下嫁月日亦無考而史稱寧理
二女又早世豈史失其傳抑別為宗室女如魏
忠獻王之安康主者皆未可知也雖然婦人內
主之賢亦可尚也已贊曰

蘊幽閒貞靜之德著端莊肅穆之容出謹厚詳雅之言
收勤劬敏慧之功噫四德者婦道全而帝姬且克慎厥
終此所以貴不自驕富不自盈雖儼然閨中之秀而自
有脩然林下之風者也

沈隱君像贊

時易乃祖

烏乎此松隱沈君之遺像也其行誼類王彥方其節操類陶元亮如褚季野神鑒內融如杜弘理儀形外朗絕輪斷鞅以謝彼紛華握瑾懷瑜以成我高尚青壁萬尋丹崖百丈悠悠我心抱此遐想

丁希丹像贊

丁公無錫人名濟川號安素希丹其字也
今年壽七十有六乃子鶴齡求為作贊

觀其貌堂然知江左之遺賢望其儀翩然疑物外之真仙惟其儼諸人也異由其得於天者全少而父命其名希濟川之舟晚而子養其志治負郭之田際咸五登三之盛世享逾七望八之高年蓋泉石生涯既安於素履

而松筠節操又老而彌堅噫斯人也抑豈徒接跡於巢由而不尤等筭於鏗籤也耶

竹深翟處士像贊

字公信武進人貢士永齡之父

不郭不郊非木非草與君子居懷隱者操三徑謾開一塵罕到其不羣也挾王子同遊其不傲也容袁尹直造惟其歲寒後凋之節既自負以考終若夫干雲直上之勢又幸其有子以克紹也

楊春官叔璵畫像贊

瑩乎無瑕者其貌確乎有守者其操粹乎無疵者其素履廓乎有容者其宿抱綽綽乎有餘裕者其用世之才

卓卓乎無他岐者其行已之道於是乎策名賢科致身
華要擢民部轉春官斯特其小試熙帝載亮天工終期
于遠到噫餘子瑣瑣徒見其多如斯人者抑何少也

吳師尼小像贊

師尼名宣號無言撫之崇仁人官
督府經歷博雅好古為時所稱

偉乎容觀豁然襟度學博才瞻心醇行古從容乎禮法
之場涵泳乎詩書之府恒默默以自存不碌碌與衆伍
噫邪說荒唐正道榛莽使斯人也得行其志豈曰小補
之哉

陳公懋小像贊

不比以為同以介乎其中不榮以為通以樂乎其窮翰
墨留神振千古之風騷公悉所居有窮樂園風翰亭道義存心守一
德之謙冲是故泊焉韋布時哉章逢而為隱君子之容
也靡哲不愚衆是用託微斯人與吾誰適從

林助教英朝服像贊

纓冠我如被服檐如秉笏垂紳佩玉鳴琚或承恩文石
之陞或獻績赤墀之塗儼陽休而山立肅蹈舞而嵩呼
帝命用嘉臣職不渝四考賢科人頌公明於衡鑑三遷
侯泮士資造就於範模陟官東序蒞任南都賢才彙征
文教誕敷由是漸進乎右官華秩益展乎訏謨遠圖圉

吾民於仁壽躋斯世于唐虞其殆庶幾無負於我
皇明之用儒者也

東齋王先生像贊

挺松栢之丰標瑩冰雪之襟懷讀書破萬卷窮探聖賢
之學抗䟽累千言大施經濟之才知之者躋之禁林延
閣何益乎東齋忌之者躋之瞿唐灩澦何損乎東齋忠
良雖未任當時股肱愷悌乃卒為斯民父母然則於東
齋之去就奚待究言而適足以慨世道之非古也

周處士像贊

吉士周敬悅前學士功敘先生之從子禮部郎
中同伯刑部主事巽之弟也周氏世有顯聞人

而欲沈志獨尚隱以家學教授田里中
子友黃秋官金重與有連屬予為題其像

生芝蘭之庭而挺松栢之貞姿胤簪纓之胄而負泉石
之幽期學為己也既不委質而為臣善及人也顧乃強
顏以為師易已東道已南擬追蹤於前哲蜀之日越之
雪寧姍笑于當時是將闢程氏之門奉董生之帷以遠
躡浴沂舞雩之境噫微斯人之徒吾誰與歸

學古兄小像贊

吾宗本簪纓之胄伯兄乃岩穴之賢閱
盛世五朝之熙皞紹名門一德之綿延弄月嘲風每舍
毫而啄句懸河注海時揮麈以談玄洗硯池頭魚撥刺

讀書窓外鶴蹁躑聞詩禮趨過庭之子供伏臘治負郭
之田其寄興于丘園也則蒼松翠竹白石清泉其娛情
于樽俎也則高歌慢舞急管繁絃享富貴康寧之福登
期頤耄耄之年然則如學古道入者真無忝山中宰相
更何求物外神仙也耶

退菴陳公遺像贊

退菴陳公諱作字永錫蘇人也先朝嘗登進士為參議為御史以忠鯁被黜者至再至三而公不為變其志操愈厲言論愈切卒僉憲臬以功名終吁可謂賢矣公歿既久其孫悅以嘗遊太學為館下士乃奉公遺像詣予請題為作贊曰

於惟退菴先輩名德道味其腴學探其賸臨政有為才

猷卓特遇事敢言忠義迅激富貴詎能移利害奚所擇
栢府徽垣未見其為榮謫籍園扉未見其為戚既三仕
而三起遂終履夫華劇噫如斯人者殆古所謂遺直者
非歟

徐閣老小像贊

此謙齋閣老之行樂像也蓋某山某丘其少日之所釣
遊而此景此圖亦平生之所好尚妙摹擬於化工巧經
營於意匠將什嚴之以無忘舊隱時一玩焉以少寄遐
想然公方居廟堂以憂民升鼎鉉而拜相獨步黃扉紫
閣間兩扶

紅日青霄上殊恩異渥既承

列聖之寵綏令聞休聲尤屬搢紳之嘉仰熙

帝載以奮庸代天工而寅亮顧其盡瘁不欺之忠當自有竹帛可書而謙虛不伐之德亦豈伊丹青之可狀也耶

德清尹江浦張公遺像贊

司寇廷璽之父

有孚厥容氣和神融有偉厥躬德盛才雄有學術以施於外有理義以養其中翹三館以與修大典望一府以協贊元戎雖中值乎屯遭乃旋復乎亨通綰綬德清播神明之異政懸車江浦擅止足之高風樂餘年以逍遙

喜賢胤之登庸祿具旨甘生享千鍾之養 恩頒綸綍
殲膺八座之封綿奕葉以貽謀藹雲仍之亢宗斯庶幾
乎光遠有耀而垂裕於無窮者也

祭酒耿公朝服像贊

用後一首

有德有容有學有文有忠誠以悟

主有道義以淵人游藝苑恣含英而咀華侍嚴宸儼正
笏而垂紳粹乎清廟之瑚璉翩然治世之鳳麟肆
帝心之簡在與士論之攸存謂不徒正模定範以領袖
乎斯文行將秉鈞當軸以霖雨乎斯民也

有德有容有學有文清廟瑚璉明時鳳麟正模定範典

教成均秉笏垂紳待漏嚴宸儀冠可仰道義可親泰山
北斗偉乎斯人

工部夏英郎中父遺像贊

氣剛而嚴性慤而愿操履既慎謀猷亦遠懷怙恃之感
則孝以時思過橫逆之來則情以理遣其始也弗戒於
火而室廬蕩廢其終也再造厥家而田園沃衍行年甫
踰耆艾教子日臻華顯秋闈論秀方人以為榮春榜蜚
英已公不及見既敷歷乎郎署遂荐承乎 恩典燎黃
先壟以永慰冥漠摹繪遺容以加飾冠冕
乃父先有章布像今更飾
以章慨離世之隱淪樂承家之文獻予於是歛衽起敬

而庸贊菲辭會將有秉筆直書以為作佳傳者耶

翟貢士小像贊

吾鄉舜民貢士對鏡自摹小像儀容
儼然衣冠甚古予偶見之戲為題贊

有玄者中有澹者襟取法于古而被服于今毋徒古其
服而亦古其心為國之琛為時之霖吾將迓此英于瓊
林也

錫世醫施彥學小像贊

號守恒

行純而誠名題月旦之評貌古而清年躋壽考之徵慕
巢由之風而甘於隱淪究軒岐之學而以其術鳴好施
予以賙人之急工治療以拯人之生介潔持身澹然無

思軒集卷之二
聲色之奉勤儉教子泊乎忘貨利之管貫一節於華皓
儕三賓於老更此其所以自號曰守恒而為鄉閭之典
刑者也

梅廷昭像贊

嚴慶祚于華族成才器於式穀辟公府而亟返乎初服
居城市而夔出乎流俗田園未蕪藹陶途之松菊子孫
多賢森謝庭之蘭玉生世幸逢咸五流年甫登重六將
由是而躋遐齡介胡福景高山封比屋以永為昭代之
逸民而遠追古人之芳躅也耶

聽泉生贊

予兄子晉卅式之號聽泉生嘗求善畫者作小像予見之為題贊曰

志貴成乎抗言戒流於放行戒通而貴特氣戒盈而貴暢服不必異而所貴者有古風貌不必矜而所貴者無俗狀泥塗軒冕奚有於我之存亡泉石膏肓一任乎人之好尚瑤琴寫山水嗣希音于寥落之餘黃卷對聖賢契至理于敦龐之上而尤不懈一息存不枉終身讓斯其所以為名家之彥而無愧乎士林之望者也

李舜明先生像贊

予友錫山李舜明先生以道德文學推重一時邑聞家多禮致之以訓誨子弟然交必以道接必以禮苟度是焉即望望然去不顧一與先生生同甲辰今年皆六十有九先生聰明強武而

思軒集卷之十二
子哀殘廢既其相去遠甚竊有慕焉蓋不徒學
行過人其術道養壽亦自有不可及者其子覺
未試秋闈以畫像
求題為作贊曰

貌清而癯氣和而舒學探其曠道味其腴才名播于搢
紳行誼著于鄉閭聞詩禮過庭教子正模範開門授徒
年邁七旬而康強無恙世守一德而始終不渝故聞其
風者謂其為隱者流慕其義者謂其為君子儒而予竊
以為未然觀其庶不怵於貲富樂不改於窮約勇不懾
於威武殆鄒孟氏之所謂大丈夫者非耶

思軒集卷之十二

思軒文集卷之十三

碑

資政大夫南京戶部尚書陳公神道碑銘

成化壬辰夏六月辛卯南京戶部尚書陳公以疾終于
位今制凡兩京文武大臣喪朝廷必遣官諭祭命有
司營葬至於勲業位望之炤灼者又益以賻贈之禮凡
此皆公所宜有而必得者南京戶部既以公計聞其叔
子鵠遂奉柩去歸其鄉以俟命焉公諱翌字冲霄鳳陽
虹縣人其先居豐之朱陳村宋季徙彭城今居虹縣者
又徙自國初祖敬先考鑑皆以公貴累贈資政大夫

南京戶部尚書祖妣妣皆夫人公幼有異質先考尚書公指以語人曰吾家世農業人知吾所治者稼而不知種德吾兒其稼之獲乎宣德壬子中應天府鄉試正統丙辰會試中進士第授行在戶部主事歲己巳虜寇犯邊

王師北征命往永平等處備芻糧永平圻內郡征輸繁重民無宿儲公百方區畫民不厲而兵饒給還奏稱肯復出內帑金數萬兩命糴粟遼陽實邊廩竣事陞郎中尋奉璽書督漕江西先是歲賦皆卒伍漕輓時朝廷用武始更以民有司承望風旨嚴程趣辦民殆弗

堪公曰賦無後期足矣奚以亟為乃循行郡邑求得其
富厚者俾具舟分漕且諭之曰此一時權宜爾師還當
無爾勞衆樂從焉景泰初上宗孝敬錄忠義備財用清
賊罰申舊典體羣臣六事未報聞尚書公計乞歸三司
御史交章留之

上命公卒事公遽已馳歸喪次聞命復往督漕抵京師
而歸服幾終會

上命廷臣舉堪任方岳者僉以公對即其家拜山西右
布政使馳傳赴任公問民疾苦為蠲其逋稅至十餘萬
石民素利五臺山木至是有禁公弛之樵蘇自若鴈門

既設兵守禦益戍以民咸釋之使歸農業公既厚民生
謂可以役其力矣始於其暇日築忻州城除道通平西
嶺又感發其良心俾修陽曲諸廟學蓋民不知勞而頌
有德者至多不容口

英廟復辟召還拜都察院右副都御史給從二品祿巡
撫寧夏時西邊連歲用兵民罷敝甚公拊循之又籍其
貧甚者計口給食奏蠲逋租之累里正者寬兩稅抵輸
布帛厥貢果實皮革諸物皆乞權罷之其地故有宣聖
廟祀禮與中州等頃歲儉止行釋菜公曰其費幾何而
用以化導邊氓其利博矣俎豆之事吾何敢廢亟復之

久之字來入寇邊將失利虜勢猖獗公檄諸部固城堡繕器械募材武士為土兵參以官兵守要害既而

朝廷命將出師虜始引去西師解嚴公乃上章乞省募不允然

上亦念公在邊久思有以少休之矣未幾陞南京戶部左侍郎

今上即位勅公總督京儲及屯田諸務公始至會臺臣建議令諸司察舉其屬公首劾罷其不事事者數輩而薦用其才且賢者廩庾廢壞其修復之資咸取具軍役而公有餘材則積以待敝公曰廩有用之物固無告之

民吾不能牽於吏議以隱忍於心也即日以便宜從事
人謂公一舉而能除數十年之弊復因災異上恤民力
錄因徒裁省鹽糧俸鈔三事丁繼母憂賜葬祭旋命起
復公懇乞終制祥禪召還京陞南京戶部尚書總督如
故三年乞奏最

上以其兼領諸務止之賜 誥命進階資政大夫公至
是功業既成精力向衰在他人若可以少自暇逸而公
感知遇期於盡瘁每晨興入公館治事食頃詣臺迄日
盱未休屬僚文移趣辦不少貸卒之以此成疾疾甚猶
日省署不廢嗚呼必如公而後可謂無負於委任矣公

為人嚴偉立朝稜稜有風望自為郎署久也憚其剛直
無敢有忤之者及出更藩鎮入踐臺省位敘日高年德
日茂晚生後進以得公接納為幸而小官下吏趨走聽
令有莫敢仰視者矣公生於永樂甲申壽六十九配李
氏封夫人側室樊氏朱氏生五男子鳳沂州判官鸞虹
縣陰陽訓術鵬義官皆李出鵠國子生樊出鸚朱出三
女其長者嫁郭宣錢宗季在室孫男五公之卒也其同
年友南京吏部尚書崔公既經紀其喪復述公履歷以
授鵠俾持以乞文於予將立碑神道予雅辱公知愛公
之妣文夫人喪膏忝執筆為銘今於銘公又奚辭其葬

以卒之年十一月壬寅其墓在邑西南沱河之陽銘曰
維古大臣以道事君道用於時惠利在民烈烈陳公遭
逢

列聖煌煌兩䟽詞嚴義正豈不公用人孰究知其所知
者公之緒餘秉德懷誠初終一節何歉於公元侯大耋
沱經夏丘爰墓其陽勒銘穹碑永永不止

吏部右侍郎兼詹事府丞贈禮部尚書謚文懿楊
公神道碑銘

憲宗皇帝臨御之日遴選文學侍從之臣既自擢用之
而尤簡其質重才良博雅有道術者兼任東朝官職俾

之日侍

諸君以講明義理輔成德性以期他日嗣守太平之業
其委任之專責望之重謂非賢不可也古人有言夫以
匹夫愛其子猶知求明哲之師而教之況萬乘之嗣繫
四海之命乎故吏部右侍郎楊公在景泰初以浙省第
一人發解明年辛未登進士第改翰林庶吉士天順戊
寅授職編修與修大明一統志癸未禮部會試聘為同
考官成化初開經筵以選為講官有白金寶鏤文綺之
賜丁亥編修九載滿陞侍講踰月

英廟實錄成陞司經局洗馬賜白金三十兩綵幣六表

裏戊子謁告歸省辛卯主考應天鄉試壬辰遷侍講學
士校正通鑑綱目賜楮幣五百貫預修宋元通鑑綱目
未成聞母太孺人喪

上念公侍從久特旨遣官諭祭庚子順天鄉試復為主
考壬寅

今上出閣公侍講讀文華大訓成陞詹事府少詹事兼
侍講學士賜楮幣千貫丁未陞吏部右侍郎戊申纂修
憲廟實錄為副總裁己酉七月辭部務命以本官兼詹
事府丞專典史事蓋公在先朝不出木天石渠者三
十有七年吏部雖嘗薦公為祭酒在廷大臣又嘗合辭

舉公入內閣皆不果用後雖稍遷詹事六年而遇
今上登極始有吏部之命初當道猶擬公南京吏部
上覽䟽取御筆塗抹南京二字左右謂吏部右侍郎劉
宣故在

上曰劉宣轉左比公再上章請解部事皆不許既而章
三上辭益懇始許之觀此則

先帝之不盡用公與

今上之果於簡用而眷遇之其意固各有在也柰何天
不假年不臻柄用以大展其經綸濟世之才豈非其命
也夫公諱守陳字維新號晉菴鄞人也自其遠祖仁爽

以來十世居鄞之鏡川大父棲芸先生潛心理學遠宗
楊慈湖黃東發諸公卓然為時名儒父自懲為泉州司
倉以公貴累贈翰林侍講學士母張氏贈宜人公在姪
時母嘗夢大星入懷及生天庭有七黑子狀如北斗人
以為異八歲入小學已敏慧絕倫讀書目五行下日記
數百言稍長便能作詩文下筆有驚人語然棲芸教之
不以記誦文辭為能而以精思力踐為務公感悟遂作
致知力行持敬三銘又題銘于牖以自勵比登第八翰
林學益進文益奇議論益醇正每進講必傳經義以納
忠誨一日講書說命篇有曰明君圖治嘗患其臣不言

忠臣進言惟恐其君不行臣不言則君徒負聰明而罔聞乎治要君不行則臣徒費辭說而無補乎上德臣言之而君行之若高宗傳說可以為萬世法矣於武成篇有曰魯論稱舜無為而治周書稱武王垂拱而天下治是則帝王之治皆不勞而佚也然後世人主有欲悉耳目所娛窮心志所樂而深拱禁中委政內侍者乃召望夷之禍有以朝事付宰相邊事付諸將而高居無為惟寵嬖艷者乃啓祿山之變是何也蓋舜所以無為者由其封山濬川以至舉相去凶無一不盡其道武之所以垂拱者由其列爵分土以至崇德報功無一不究其心

思軒集卷十三
七
皆嘗憂勞而有為乃始佚樂而無為也後世人主則孟子所謂安其危而利其菑樂其所以亡者耳聖狂治亂之異非以此歟

上歛容聽之大臣退班相語曰真講官也至於應制詩文亦不忘勸戒嘗作內宴樂語以時方事逸豫則曰謂豐大必宜日中故亨大尚虞城復以時方尚遑功則曰慕帝舜之格有苗思宋國之相司馬以時方貴異物則曰不作無益而功成不寶異物而民足乃召公之格言無輕民事而惟艱無安厥位而惟危又伊尹之明訓公既進呈退語他學士曰萬一

天子過聽不賢於優孟滑稽之談乎會有詔議祧廟公
上䟽言禮天子之廟祖有功而宗有德我

太祖皇帝有大功于天下當為百世不遷之祖今

憲宗升祔宜併祧

德懿僖三祖自

仁祖以下為七廟異時祧盡

太祖居初室四時享祭正位南嚮三歲一祫則

德祖居南嚮之位各不失其尊庶無悖禮時禮官已定

議九廟以

德祖為始祖不祧第祧

懿祖而一歲一裕不盡如公議然知禮者躋之成化改元正月公上講學聽政之疏其略曰精一執中此堯舜之得於內者深而為出治之本也明目達聽此堯舜之資於外者博而為致治之綱也臣願

陛下遵用舊制開經筵以講學御午朝以聽政一日之間居文華殿之時多處軋清官之時少力行堯舜之道而深得於內博資於外則宿弊可革善政可成而唐虞之治可馴致矣反覆數百言於正心脩德保邦致治存天理遏人欲親君子遠小人凡有益於天下國家者靡不詳盡而辭極剴切

上嘉納之即日諭禮部以三月御經筵禮部請併午朝如楊某奏制報可至於作史其予奪一出於公書法一以春秋通鑑綱目為準公謂古人云國可滅史不可滅太祖定天下即命儒臣撰元史

太宗靖內難其後史官於建文君事諱而不書遂使當時朝廷政事與忠於其事者皆缺略無傳及今猶可補緝

景皇帝已復位號而

英廟實錄標目猶書郕戾王附是宜改正前代人臣章奏雖不報者猶書近時留中之奏例不得書乞宣付史

館凡若此者數事章未及上而公已屬疾識者尤深惜之已酉十月太白犯進賢甚急占者云賢人厄既而公卒於是月十八日蓋其應也春秋六十有五

上聞訃嗟悼贈禮部尚書賜謚文懿命禮部諭祭工部營葬配丁氏諱玉英邑名家女躬勤儉以佐公宦學脩甘旨以事姑張夫人得其歡心初以公貴封孺人後進宜人時節入朝賀

兩宮加賜賚貴富矣猶日課諸婦習女紅不輟教諸子勤問學以至於有官于朝猶訓飭之使無忘儉戒宗姻外內頌其賢年六十四以庚戌六月十一日卒其年十

一月六日與公合葬玉堂山之原三子茂元中乙未進士累官湖廣按察副使茂貞蚤卒茂仁中丁未進士授刑部主事孫男七美珩郡庠生美璜美琚美瑀美瑤美環美瑜女三公天性孝友與人交篤於信義居常退遜體若不勝衣言若不出諸口至高確義理論事是非曲直則侃侃剛直雖壯夫不逮也嘗被命教內侍省嚴立矩範無少假貸教成多去為近侍與公同事者率因之取寵貴而公獨無少資藉士論多之公勤學喜讀書遇有所得即為論著蚤歲嘗作五經四書私抄敘正其錯簡更定其章句擇取諸家傳註而自以所見立說晚年

屢加剛定皆擴前賢之所未發而詩書二經尤為精到
至其家庭授受而用以取科者則專門易學蓋公既得
之棲芸而遂以傳之弟君子公弟三人並舉進士守陞
亦魁浙省歷官翰林侍講春坊諭德守隨由應天尹為
廣西叅政守隅三部主事文學政理爭爽競秀而茂元
茂仁尤濟美焉公為文舉筆立成不煩宿構詞雖閎博
而卒澤於理詩尤渾雄流麗然不戾於雅正四方求者
接跡戶外公應之不以為瀆也其所著有晉菴鏡川東
觀桂坊金坡銓部諸稿藏于家公疾亟語諭德君洎茂
仁曰吾學至為君子仕登乎三品年邁乎六袞夫復何

憾惟

新天子厚恩未能報先祖棲芸先生未及封汝曹其勉
圖之又曰吾所交皆文章鉅公然知我深者惟冢宰王
廷貴司寇何廷秀少宰劉紹和我死可求廷貴作神道
碑廷秀作墓誌紹和作傳言訖精神猶耿耿喘息漸微
瞑目端坐而逝公卒後越月茂元奔計過金陵以公治
命告予既而諭德君遂以公行述來顧予何人乃敢承
公之託耶第以同年及第同官翰林道義相親之日久
公三弟府尹諭德嘗同官兩京工部從予受業南雍而
予子參政沂又公考應天所取士公子憲副復與沂同

年契誼之深誠無有過於予者遂不揣菲陋景公言行之大論次之而系之以銘銘曰

惟古盛時士多方聞窮理以學載道以文世教日淪俗儒滅裂學殖將落辭有枝葉有煒楊公越產奇才夙承示訓茂擢倫魁繼登甲科列職翰苑更事

三后荐沐天眷

今皇紹統信任不疑曰予舊學

先帝所遺公感知遇誓竭忠藎銓管稱平論諫無隱春秋之筆周孔之言總裁國史勸講經筵道合議從秉用伊邇邦國殄瘁而公已矣計音上聞

當寧興嗟寵終之典視衆有加感恩未報公有遺恨易
簣之言以勗厥胤有弟有子世學世科三鳳二龍踵接
肩摩諸孫振振亦復穎異世德方殷其承未已公雖云
亡簡編具存殘膏賸馥沾丐後人公亡無何宜人奄逝
淑德令儀殆不勝紀玉堂之山有封若堂旣固旣安雙
壁同藏墓門有石過者必式公有治命予無愧色

通議大夫都察院右副都御史楊公神道碑銘

都察院右副都御史無錫楊公以成化十年四月二十
七日卒于河南之行臺壽五十有九計聞

上命驛舟歸其櫬禮部諭祭工部營葬公之子紳卜以

是年十二月丙申奉柩葬神護鄉長腰嶺新阡乃具事
狀請銘其神道之碑公諱璿字叔璣自少穎悟喜學正
統戊午中京闈鄉薦己未登進士第尚未授室乃以假
歸還朝拜戶部主事陞郎中累遷山西叅政陝西右布
政使河南左布政使命下公已聞母喪服除召為戶部
侍郎入謁改都察院右副都御史奉 璽書撫治荆襄
流民巡視北直隸節制永平山海密雲居庸等邊關巡
撫河南數歷中外幾四十年以勞瘁乞休章再上不許
崇王之國郊迎感寒疾殆甚猶日就卧榻治官書郡縣
吏白事戒直入卧内口占酬應 勅至命加公服猶強

起不能支頃之遂卒嗚呼公可謂盡忠于國一息不懈者矣公才質通敏負器局論事果斷無媿阿態在地官為大司徒金公所器財賦出納凡經公籌畫不復訾省在山西徧歷州郡覈實戶數立上中下三等法均其徭役民用利便奉勅督輓軍餉二十萬石實邊廩事集而人不知勞陝西地控三邊動輒有警徃歲西夏用兵芻粟轉輸皆公調度洪渠水溢涇陽縣治堰以殺其勢賑恤匱乏存問瑣獨其治民如山右而加勞焉蓋在山右者八年在陝五年而有河南之命先是流民嘯聚荆襄南陽山谷間以百萬計朝議求堪任拊循重寄者僉

宜於公故

上始欲任公典邦賦尋撤公以去授以峻秩加賜寶鉉公單騎直抵其境勤宣

帝命周行賑贍留者占籍去者贏糧遠邇晏然未幾有盜起房竹縣境相挺剽劫公曰是曹殆困於饑寒者猶撫諭之弗從乃請加兵俘獲數千人衆議謂當揃刈公持不可曰殲厥渠魁脅從罔治此

上意也第戮首惡數人餘悉縱遣之是歲畿內八郡歲凶公聞命兼程以進首閱預備四倉空無所儲百方營聚有司怠於趨事者公繩之急而豪宗鉅室又憚公勸

分遂騰口肆謗公一無所顧惟汲汲以康濟斯人為務
比移河南先聲所至人益慕賴化行俗阜

上嘉念公寵賜綵段四表裏而公亦感

上知遇益勤於事剖決無滯日力不足繼之以夜所至
敷求人瘼搜剔吏弊禁游末抑豪右奸宄屏跡而善類
知勸公天性介特與人交不苟合始舉進士鄉人有為
中官者氣燄熏灼人趨之恐後公絕不通問家雖富饒
其自奉極清約祿俸所入分給姻族一姊嫠居時加問
遺二兄傾逝厚撫其遺孤子而處諸弟篤友愛塾師夏
處莊匡文佐卒亦優恤其後嘗闢義阡葬死無歸者蓋

公既豐顯從弟叔璫亦起家甲科歷官郎署群從子姓
或輸粟補官或明經擢科後先相繼公每以盈滿為懼
寓書戒之俾知嚮義故公平生所為多義舉其性尤酷
嗜文史殘碑斷碣打搨殆徧見異書必重購得之作為
文章渾厚沉著於詩尤有思致遇佳山水吟眺終日公
退手不釋卷蓋其嗜學之心久而不倦中歲既有退志
遂題其居曰宜閒有宜閒集若干卷藏于家其先世有
令德曾祖廣元季舉義保障鄉邑時識者已占其後必
興祖原振考宗淵皆以公貴贈通議大夫都察院右副
都御史祖妣張妣朱皆贈淑人配唐氏由安人累封淑

人子男一即紳以蔭補國子生孫男一曰昂公自束髮
即有志天下濟世康民之具皆其素蘊嘗與其僚南劔
黃琛西蜀陳价三人者以意氣相期嘗曰使吾輩為
朝廷獨當一面憑仗威靈徇以驅馳功業之成期於
不負後三人果相繼為方岳陳仕至都御史黃卒官戶
部侍郎出入朝著卓然與公相望質諸前言不爽毫髮
傳曰事君先資其言拜自獻其身以成其信如伊傅管
樂是也烏乎使天假之壽考

上信任不衰其所就不庶幾古人已乎銘曰
天佑

聖明英賢挺生發名成業為時股肱地官劇曹岳牧重鎮肅肅蘭臺秩號雄峻士霑一命亦足為榮公于其間屢踐屢更步履所至茂隆聲實維

皇聖明嘉乃丕績邦計所屬錢穀委輸泰繁絲棼待用無遺暨歷雄藩于秦于晉或專或裨厥聞大振民有父母國有屏翰公宜久任遽罹家艱入貳司徒既有成命屬茲流移須公撫定回授中丞秉鉞南征公霽其威仁施惠行弄兵潢池何物小醜苗薈髮櫛微公孰宥邦畿千里凋瘵以蘇越茲大梁載道歡呼公官雖進而志則退天不慙遺邦國殄瘁計音來聞哀感

宸極賻奠有加聲建瑩域華皓一節哀榮始終銘以美
辭以詒無窮

通議大夫南京戶部左侍郎致仕馬公神道碑銘
南京戶部左侍郎致仕馬公以成化壬寅十二月廿四
日卒于家計聞

上命知和州葉睦諭祭進士王琳營葬葬有日其子永
賢乃持葉知州狀謁予請銘公諱諒字子諒其先汴人
六世祖必興仕宋為江淮統制因家于滁之全椒必興
生天麟元江淞儒學提舉高祖正甫龍興路學教授曾
祖信叔登延祐進士第元季倣擾伯祖九成舉義從

太祖高皇帝渡江累建奇勲授金牌萬戶與陳友諒兵
鏖戰鄱陽湖死之

上憫其遺孤賜居和州故今為和人祖九思考雲以公
貴贈通議大夫應天府尹祖妣鄭氏贈淑人妣徐氏累
封太淑人公生之前一夕太淑人夢月光入室叔祖澤
聞而異之曰顯吾門者必是兒也自幼聰穎絕人書數
百言過目便能成誦七歲入家塾十五入州庠初習書
禮二經後專攻於詩宣德壬子領鄉薦癸丑中進士第
觀政戶部督賦廣藩丁外艱服除授行在吏科給事中
數陳時事閭切知大體奉使山右封藩王恪謹禮儀

賞賚一無所受正統甲子陞山東布政司左叅議景泰
辛未陞應天府尹天順丁丑陞南京戶部左侍郎三月
奉表賀闕下陳情歸省有寶鑑之賜六月丁太淑人憂
庚辰召至京蒞事戶部壬午復南京戶部癸未滿九載
上疏乞骸骨 詔許之蓋公尹應天時嘗忤權貴思有
以中傷之久矣至是以公老疾為言而公年纔五十八
實未老士論惜之公為人精敏究心吏治其始至山東
也循行郡邑訪庶政得失察百司賢否廢興黜陟悉協
公議會河決張秋 朝廷雖遣大臣治之然分理之務
多出于公水訖不能為患正統末胡寇犯邊降虜安置

山東者欲乘機為亂 朝廷憂之以勅諭三司戢民守
城公曰此勅不可使聞於衆俄有馳生擒胡寇文移至
者乃集衆諭之衆咸帖服民有感於後妻而欲置子於
法公喻其父母曰昔夫子為政誅少正卯而宥不孝以
教令不明也今爾子有凶德乃吾屬教令之失非猶爾
民之罪也其父母感悟遂請釋之還為孝子有民婦與
夫兄有隙而縊殺其子姦人之婦而殺其夫匿其碑券
以強占民田盜米廩餘地以廣其居皆久訟不決公一
訊即伏其辜歸其侵地而於負冤者尤力為辯雪比至
應天府事填委公裁決如流案無留牘溧水民素健訟

一日投牒至八百公視其虛實而異置之召訟者曰某也實某也虛虛則受笞實則待勘民願受笞者十七八待勘者不一二焉其俗人死而利其妻者出棺斂之人已出棺復有載棺至者妻欲嫁後至者用其棺而先出棺者訟于縣不直復訟于公公責令曰薄俗不能禁民死無所歸安用令為乃杖出棺者以棺給貧民而歸其妻於所親使俟終喪別適焉六合貧民與其弟妻同劫人三斛粟事覺當棄市公曰以三斛粟而殺一家三人吾不忍也乃為出其弟妻其人臨刑號於衆曰吾死無所憾但吾尹之德無以報爾句容有因人死而棄毀其

屍者所司擬以支解人罪獄上公不可曰死後棄毀詎可與生前支解同科為輕減之先時堂鈔獨歸于尹凡百供需悉出倚郭二縣民不勝擾公至一無所取分給僚屬之餘則儲以備燕饗饋饁又積其餘以為工傭之費名曰公餘錢凡重建府治修葺廟學創立貢院皆取給於此無勞民傷財之患既而擢貳地官曾未越月綱紀秩然政有未便者條陳於

上苟益於時無所顧忌先是為參議時陳撫安軍民五事府尹秩滿陳恤民十三事朝覲至京又陳便民九事上覽䟽嘉之多見施行蓋公歷官中外餘三十年門無

私謁謝事而歸囊橐蕭然田宅讓諸弟姪別建居室少
買田業治常產而家無綱紀之僕多公自綜理暇則閉
戶焚香繙閱墳典課子姓業明經而已當道至和訪以
時事輒謝曰老耄無所與聞與守臣言無一語及私鄉
人以請託至者拒絕之或以利動則曰吾後事具矣安
用此為其清節雅操至於老而不變公素感末疾至是
復作召子孫語以後事姻戚以候疾至者亦語如平時
乃促其沐浴端坐衣冠而逝春秋七十有七卒之又明
年正月丙午葬歷陽山祖塋之次配王氏封淑人先十
四年卒子二男長永賢王洲人出成化甲午中京闈鄉

試次永年國子生側室出三女適州庠生顏澣指揮同
知李春其幼者受指揮使孟達聘孫男一曰中公為人
厚倫重誼以孝事親恭兄友弟撫遺孤接族婣皆篤於
恩意與人交悃尚道義處同寅和而有節御屬吏嚴而
不刻故其處為名士其出為賢臣德器脩於家勲業著
于朝名聲彰于時雖去不待年用之不究其才然舉以
儕之古哲聞人於公復何歎焉是宜銘銘曰

馬氏世胄實基于汴滁和再遷繼世逾顯維公祖考蓄
德弗施慶鍾於公乃荷寵綏公才夙成決科從仕黃門
顯秩銓衡是淮出佐魯藩入尹舊都

帝曰汝賢貳我司徒輔理宣化裕民足國曾幾何時有
煒厥績北臺之召尋返于南去險即夷公志所甘公年
未耄超然引退讒間雖行君子所貴古有名言保晚節
難幽室全歸亦固後難寵終有恩裕後有澤太史作銘
垂耀無極

嘉議大夫都察院右副都御史吳公神道碑銘
成化乙未八月二十五日總督兩廣軍務兼理巡撫都
察院右副都御史繁昌吳公終春秋五十有一

上悼惜之命有司葬祭如制公之子約以又明年丁酉
正月某日葬公于邑汪冲山之原葬已走京師謝

上又命約入冑監以承厥蔭約感激

上眷追念先烈期有以表彰之遂奉其鄉人咸遠知縣
宣達狀以神道之碑來請嗚呼予與公同為畿內人同
領鄉書同第進士官兩京才名位望予雖不及公遠甚
至於以道義相期氣節相許固未嘗少間也公未終之
前數日嘗以書抵予賀予子沂擢第謂吾亦有子頗知
好學伺其成立當乞身于朝以歸從兄遊噫公之所以
望於予者何如也而今已矣晚節末路顧何所賴以為
規哉故於公之終既為位哭之又為辭弔之則斯文也
非予其誰宜為哉按狀公諱琛字輿璧號愚菴賦性警

敏年十四補邑庠生日誦數千言為文章操觚立成儕輩莫敢與爭雄正統甲子以書經登鄉榜乙丑戊辰兩試禮闈不利益勵於學一夕方讀書嘔血數升母蔣氏驚社祀之戒勿復學曰脫以是成生學亦奚為而公竟不少輟但掩覆無使母知居數年學大有進經史子集靡不淹貫下筆為文益奔放不羈景泰辛未登進士第援例還家畢姻先已久聘章氏蓋不第不娶至是始娶年二十七矣癸酉秋拜雲南道監察御史奉勅往甘肅人懷之三載給勅命封父聽如其官母妻皆孺人

天順丁丑

英廟復位武清侯石亨以功封忠國公專權自恣漸蓄
無將之心公與同官劾奏之忤 旨補外知遷安縣五
日天變雨雹命還公臺職尋被選居臺端掌文案故事
凡三司會讞獄囚十三道文移刑牒必擇老成諳練御
史二人綜理之蓋以裨總憲之不及而為諸道之領袖
古之雜類也時公與同年高公明對筦五年臺中稱賢
辛巳陞大理寺丞歲餘陞都察院右僉都御史巡撫西
陲莊浪去城四百里有地深入狄境前檢田者占數屯
糧五千七百斛迫於徵輸軍多竄匿公首䟽罷之西番

扒沙巴哇等七族累歲盜邊撫之不服協同平羌將軍
宣城伯衛公穎征勦之斬獲千三百級馬駝牛羊甲仗
輜重無算賊平陞俸二級是歲朝廷推恩加封父聰
官都御史母蔣氏恭人成化改元還朝議事適四川妖
人趙鐸謀叛改命公往討鐸敗中止涖臺事時淮揚荐
饑尋命公賑卹公勞心焦思凡事有益於救荒者率以
便宜行之而言多切直大忤權貴雖民賴以濟而公之
謗滋矣明年春召還言官劾奏必置公於法公危甚賴
天子聖明第遷官南臺時代者都御史林公聰於公所
行事一無更張且言於人謂公實有益於民無負於國

於是其誣遂釋而聲稱益重來南未幾丁母恭人憂繼
丁都憲公憂兩遭親喪哀毀踰禮再朞不御酒肉四方
賻贈一無所受 朝廷凡兩遣官諭祭公先以僉都御
史三載秩滿至是始頒 誥命進階中憲大夫加封章
氏恭人已丑服將終遣使齋 勅即其家授之命巡撫
兩廣至廣纔半歲代回南臺未至復遣使以 勅授公
巡撫湖廣時湖南已數月不雨民嗷嗷望哺公祈禱不
數日雨露足自是拊循郡邑問民疾苦窮荒僻陋之區
無所不至凡在湖廣者五年威行惠施殊俗輯和會寧
夏花馬池達寇入境兵部以公嘗在邊方熟知軍務擬

奏與巡撫陝西都御史徐公易置而湖廣鎮守三司又
從民之欲兩上章留公甲午有 旨許留進右副都御
史適總督兩廣都御史韓公致仕 朝廷求繼韓者僉
謂非公不可於是輟公以去去之日郡邑父老扶携攀
送齋咨涕洟而公亦為之悲不自已當時士大夫言巡
撫大臣能深得軍民之心如公者前此蓋未見也公至
廣其撫民無異湖湘而於訓兵練士則尤加之意蓋嶺
南寇盜矯虔其為患尤非他方比也英德流民羅瑛郭
瓊輩聚眾剽掠命兵擒之新會新興連界有劇賊嘯聚
流劫村落餘十年公一旦馘其渠魁殲其黨與六百餘

人徭獐聞之大駭相戒歛迹柳慶諸州其巢穴也公親至其地檄召之許以自新詣軍門俯伏聽命者日以萬數公曉以禍福無不踊躍而去時識者又謂廣寇冥頑可以威懾而不可以理論以理論之而革心向化如公者亦前此未見也公為人勤敏自童壯至沒齒無日不雞鳴而起二鼓而寢雖閫外事叢酬應絕無壅滯少餘閒博觀群書以資聞識上自公卿大夫下至閭里後生書教往復無不手荅動輒盈幅初若不經意者而文理通貫情意孚洽雖屬草有所不及雖身居顯位其自處一以謙抑待人無貴賤必以禮處舊故無相忘有所

饋遺纔及金帛輒辭不受其平生所得俸祿又日費於
賓友故子姓衣食或不給身歿之後貲業蕭然視先公
所遺不長尺寸娶恭人章氏先四年卒至是合窆焉繼
娶鳳陽千戶任君女一子曰約讀書有成即公所語予
者今為太學生四女長惠廉適戶部員外郎嚴君子瓚
餘幼在室公先世歆人宋季諱伯繁者徙居太平之繁
昌三梁山下公八世祖也曾祖可立祖廷升皆不仕其
先世譜牒散逸公纂成之又為家規十八條以訓戒後
人予為之序公平生所著詩文多不存稿其存者惟愚
菴集若干卷年譜若干卷

上所賜璽書與公之奏議具在亦足以垂不朽矣銘曰
於赫 皇明道洽治隆

列聖紹統群賢奮庸暨暨吳公官登侍近珥筆臺端按
節邊郡遂丞大理荐陟中丞

帝曰汝諧殿我西平蜀寇搶攘將命中止淮人阻饑尋
命往撫頌聲既作流言亦興不擴於危賴我

聖明比官留臺出鎮南服湖湘牧寧嶺海龍奮伏允文且
武有燁其光人孰無死公胡可亡有亡者存有功有烈
雖存奚為有歟名節汪冲之原有碑墓門垂耀無窮
此刻文

榮祿大夫右軍都督府都督同知沐公神道碑銘
雲南副總兵都督同知沐公之終也

上為輟視朝首命雲南布政司致祭者四給粟布賻贈
有加極至南京復命禮部諭祭工部營葬葬有日公子
誠具事狀請予題銘神道公諱璣字廷器先世鳳陽定
遠人曾祖諱英洪武中以西平侯統兵征夷雲南平留
鎮其地歿封黔寧王謚昭靖伯祖諱晟嚴兄春侯爵永
樂中征交趾有功封黔國公追封定遠王謚忠敬祖諱
昂累官都督正統間討平麓川叛寇思任發卒贈定邊
伯謚武襄考諱僖字可怡初授南京錦衣千戶後以子

賁贈都督同知妣封太夫人徐氏公幼襲父蔭為千戶
天順戊寅入朝京師會兄總兵官都督璘凶問至
上念沐氏世守雲南為遠夷信服不欲以兵政更委他
人遂召公至便殿諭旨陞右軍都督府都督同知充總
兵官掛征南將軍印馳傳還鎮公承命感激圖惟報稱
修飭城壘增羨廩庾作興學校禁戢奸宄凡事有益於
邊徼政有便於兵民者皆以次興舉未幾祿谷寨叛公
命都指揮高遠率兵勦之露蓋州賊阿賽與土官適仲
構兵諭令解散而讐殺益甚則命都指揮張諒翦除之
隴川蠻酋木梅罕賢爭地以戰揆其勢非一旅可辦乃

協謀三司巡守諸公遣使諭以禍福許其納款第遷謫
遠方餘罪悉宥不問歲壬午麓寇餘孽思卜法肆行劫
掠侵奪孟木諸夷土地意圖不軌蓋其勢又非一信使
可諭也於是請命于 朝會集鎮守三司相機設策大
為攻守之具卒之賊衆膽喪兵不血刃而邊圉輯寧居
人按堵 朝廷嘉之錫以白金綵幣旌其勞伐成化改
元乙酉

皇上嗣統益隆委任荐承銀幣之賜三年今黔國公繼
鎮雲南遂命公協同贊理四年復命為副總兵移鎮金
齒公即日就道比至永昌宣

上德意問民疾苦恩浹士卒化行夷獠不四三年邊塵
無警歲獲豐穰盖前此所未有也庚子夏邁疾上章謝
事 詔勉留之謂公官高望重與他人衰老不同於是
不復敢言遂至不起公質幹魁碩器宇宏邃聞人有善
不啻在己掩人過惡甚於護疾而且優於謀略精於騎
射此其所以能迓承 休命篤前人成烈使人稱一時
名閥能堪聞寄如公者指未易多屈也公娶夫人賈氏
前都察院右副都御史銓之女生二子長誠雲南左衛
指揮僉事金齒之人之不忘於公者合詞
上請願得誠嗣守其地次謙早卒詳諫側室出公生於

正統己未七月二十二日卒於成化辛丑四月十六日
享年四十有三以壬寅九月二十六日葬江寧縣長泰
伯鄉觀音山祖塋之次予既敘其事又系之以銘曰
西平錫封奮自昭靖黔始有國實維忠敬武襄繼敘榮
康紹承爰暨爾後世篤忠貞維公材雄列職禁衛比朝
于京適際其會

帝曰休哉予惟爾賢爾予世臣往填于滇崇其勲階授
以節鉞公既戾止滇人乃悅猗昔先王奠我南邦嗣世
有慶吾民用康公感其言式克自勵不寬不煩戎律有
紀殲其小醜撫其夷酋四封底寧百廢具修 璽書贊

嘉加以寵賚委寄益隆鞠躬盡瘁維公在邊有勞有勤
報卹有典溢於常倫我作銘詩陳之隧道述德勸忠為
百世告

思軒文集卷之十三